

Supervizor Crishock: Brčko Distrikt nema vremena za gubljenje



Prvi zamjenik visokog predstavnika i supervizor za Brčko Distrikt Louis Crishock se sastao sa gradonačelnikom Sinišom Milićem, dogradonačelnikom Antom Domićem i članovima novoimenovane Vlade Brčko Distrikta, kao i sa predstavnicima institucija, predsjednikom Skupštine Damirom Bulčevićem, dopredsjednikom Ivom Filipovićem i predstavnikom Ureda tužitelja Radmilom Ivanovićem.

Na sastancima sa zvaničnicima Distrikta razgovaralo se o rješavanju sistemskih izazova i jačanju institucionalne odgovornosti u Distriktu. Crishock je naglasio važnost saradnje među agencijama kako bi se odgovorilo na potrebe stanovnika i učinkovito riješila goruća pitanja. Pozvao je na brzo, koordinirano djelovanje koje će dovesti do značajnog napretka u reformskoj i razvojnoj agendi, te time poboljšati živote građana Brčkog.

“Saradnja je od ključne važnosti kako bi Brčko Distrikt i dalje služio kao model za učinkovito upravljanje i odgovornost. Pozivam vlasti u Brčkom da pojačaju svoje napore u vezi sa rješavanjem pitanja od suštinskog značaja, koja uključuju razvoj infrastrukture, otvaranje novih radnih mjesta u privatnom sektoru i jačanje mjera za borbu protiv korupcije. Brčko Distrikt nema vremena za gubljenje”, rekao je supervizor.

Tokom sastanka sa predstavnikom Ureda tužioca Radmilom Ivanovićem, Crishock je izrazio saučešće zbog iznenadne smrti glavnog tužioca Zekerije Mujkanovića.



